

HIV-positivs han dischavantags

«La stigmatisaziun sociala cunter persunas ch'èn HIV-positivas è anc adina in grond problem», di *Lisa Janisch*, la manadra da l'Agid grischun cunter AIDS. Quai malgrà che persunas che sajan HIV-positivas hajan bunas terapias e possian viver ozendi senza impediments. En il Grischun vivan actualmain circa 300 persunas cun quella diagnosa.

MARTIN GABRIEL/FMR

Il tema HIV ed AIDS è crudà in pau en emblidanza ils davos dus onns er pervia da l'actualitad dal coronavirus. Tenor il rapport annual da l'Agid grischun cunter AIDS sajan las agendas da las persunas da cussegliaziun tuttina stadas plainas e pli che plainas cun terminis. Bliers da quests terminis pertutgan persunas ch'èn infectadas da nov cun HIV. Tenor la manadra da l'Agid grischun cunter AIDS, *Lisa Janisch* hajan fitg bleras e blers anc il maletg da pli baud avant lur egl. Tenor quel muntava igl esser HIV-positivs ch'ins stoppia murir. «Nus empruvain da gidar da vegnir a frida cun la diagnosa e da cussegljar co viver cun HIV.»

Persunas cun HIV vegnan stigmatizadas

«Fitg blers tschertgan la cussegliaziun da l'Agid grischun cunter AIDS perquai ch'ellas ed els vegnan exclus en il mintgadi», ha *Lisa Janisch* ditg a la FMR. «Sch'in dentist prenda per exempel ina persuna cun HIV pir sco davosa pazienta u pazient dal di cun l'argument ch'el stoppia suenter quest tractament dischinfectar la sutga, lura è quai ina stigmatisaziun cunter persunas HIV-positivas. Ed il medem vala per la protecziun da datas che vegn violada entras indiscreziuns.» La manadra da l'Agid grischun cunter AIDS na chapescha betg daco che malsegirezzas na vegnan betg scleridas. Anc oz, damai 40 onns suenter ils emprims cas dad AIDS en Svizra, è la stigmatisaziun dals umans cun il virus preschent tant en la vita privata sco er en il mund da la lavur preschenta. «Igl è strusch da crair, ma i capita anc adina ch'insatgi na survegn betg ina piazza perquai ch'ella u el è HIV-positiv. Ed i capita er ch'ina chasa d'attempads na prenda betg ina persuna HIV-positiva. Quai è abstrus, sch'ins considerescha ch'ina persuna cun HIV cun terapia na po betg infectar cun HIV in'otra persuna.»

En la citad per avair ruaus

Lisa Janisch ha confermà ch'i dettia pli blers HIV-positivs en las regions urbanas ch'èn las regions champestras. Ma che quai na muntia



Dapi 2020 appellescha l'Agid svizzer cunter AIDS cun quest maletg cunter la discriminaziun dals umans ch'èn HIV-positivs.

FOTO MAD

Tgi è l'Agid grischun cunter AIDS

L'Agid grischun cunter AIDS è in post da cussegliaziun gratuit cun ina suprastanza ed ina squadra da cussegliaziun a Cuira. Il team da cussegliaziun è suttemess a l'obligatori da discreziun. La cussegliaziun disponsa da persunas cun las enconuschientschas dal rom e che han ina tenuta averta. Il team è neutrals areguard la vegliadetgna, la schlattaina, l'orientaziun sexuala, ubain era la derivanza e la religiun da las persunas che tschertgan ina cussegliaziun. L'Agid grischun cunter AIDS cusseglia per telefon, per e-mail ni era en il lieu tar il post da cussegliaziun a Cuira. Il post ha ina rait da contacts cun medis da chasa, dentists, infecziologs, ginecolocs, urologs sco era psicoterapeuts e terapeuts da sexualitad. L'Agid grischun cunter AIDS è domicilià a la Lürliadstrasse 15 a Cuira. Ulteriuras coordinatas èn: info@aidshilfe-gr.ch.
Telefon: 081 252 49 00

betg che tut quellas e quels en las citads derivian era da las citads. Bliers omosexuals cun HIV che vegnian exclus u stigmatizads en las regions champestras mondian en las citads as abitar per avair ruaus. «Quai n'è dentant betg in trend. Bleras e blers HIV-positivs restan er qua», di *Janisch*. En las vischnancas dal Grischun vivian circa 300 persunas cun HIV. «Las bleras vivian cun la terapia da medicaments che impedescha che la malsogna dad AIDS possia insumma rumber ora.» Ina persuna positiva che fetschia la terapia na possia infectar nagin pli. Uschia haja er gia dà dunnas cun HIV che hajan parturi uffants sauns, ha ditg *Lisa Janisch* da l'Agid grischun cunter AIDS.

Protecziun è anc adina indispensabla

Tenor l'Agid grischun cunter AIDS è HIV è oz anc adina ina greva malsogna ch'ins sa dentant tractar. Tar novs contacts cusseglia *Lisa Janisch* exnum anc adina da duvrar condoms. Lura cusseglia ella da laschar far in test medicinal suenter mintga nov contact. Per persunas che sajan gia HIV-positivas porschia la terapia ina buna protecziun. «La perscrutaziun medicinala è sin buna via da scuvrir terapias ch'eliminieschan in bel di dal tuttafatg la malsogna da HIV. Sin il pli tard dapi il coronavirus savain nus dentant ch'in virus ei in problem global. Perquai na po il problem dal virus da HIV mai vegnir schlià be per la Svizra.»